

Wakil EU temui pengurusan Irda

JOHOR BAHRU: Sekumpulan wakil Kesatuan Eropah (EU) mengadakan pertemuan sulung dengan Pihak Berkuasa Pembangunan Wilayah Iskandar (Irda), semalam dalam misi diplomatik untuk mengenal pasti kerjasama yang boleh dilakukan dalam usaha memakmurkan wilayah masing-masing pada masa depan.

Delegasi diketuai Vincent Piket bersama 15 duta dan Charges d'Affaires lain dari Austria, Croatia, Belgium, Republik Czech, Finland, Itali, Belanda, Ireland dan United Kingdom itu mengadakan dialog bersama pengurusan Irda di Pulau Springs Resort di sini.

Ketua Eksekutif Irda, Ismail Ibrahim berkata, pihaknya berbesar hati menerima kunjungan delegasi itu yang disifatkan mampu memacu pertumbuhan positif dalam bidang ekonomi, politik dan sosial khususnya di wilayah Iskandar Malaysia.

"Pertemuan sulung antara delegasi EU dan Irda menyediakan landasan kepada dialog dan kerjasama antara

EU dan negeri ini dengan pengkhususan dalam perdagangan, pelaburan, kerjasama luar sempadan, pengangkutan, pendidikan tinggi, penyelidikan serta kerjasama saintifik.

"Antara topik dibincangkan ialah pengalaman dan perkongsian berkaitan kejayaan EU dalam hal kerjasama melangkaui sempadan, pergerakan rakyat dan barangan," katanya.

Menurutnya, wilayah Iskandar Malaysia dan Johor amnya akan mendapat faedah selain belajar daripada pengalaman EU termasuk memaksimumkan kerjasama luar sempadan.

"Banyak perkara yang kami belajar melalui sesi dialog ini termasuk kerjasama merentasi sempadan negara yang berjaya dilakukan EU," katanya.

Sementara itu, Piket berkata, Malaysia mempunyai rekod dagangan baik dengan EU dan pihaknya berbesar hati dapat berkongsi berkaitan pengalaman EU terutama dalam kerjasama merentas sempadan negara.